

Wednesday, October 22, 2025

Time - 2:30pm - 2:35pm

AKASHVANI AIZAWL
REGIONAL NEWS UNIT

DAMPA BY-ELECTION SCRUTINY

Thla thar November ni 11-a Dampa bial By Election neih tur a hming pe lutte enfiahna scrutiny chu vawiin khan Dampa bial Returning Officer pu Malsawmzuala hova Mamitah neih a ni a, he hunah hian by election chuh tur a hming pe lut te chuan enfiahna an pal tlang vek a ni.

Returning Officer Pu Malsawmzuala chuan Dampa bial by election chuh tura nomination paper an dawn zawng zawng ten scrutiny an paltlang a, vawiin atanga naktip (october ni 24) tlai dar 3 tlang candidate te tan inhnuhdawhna hun hawn anih nghal thu a sawi a ni.

Byte : Returning Officer Pu Malsawmzuala

Dampa bial by-election ah candidate 5 an awm dawn a, BJP chuan Candidate atan Pu Lalhmingthanga thehchhuakin, Congress in candidate atan Pu John Rotluangliana an ruat a, MNF in an candidate atan Dr R Lalthangliana chhawp chhuakin ZPM chuan candidate atan Pu Vanlalsailova an ruat a, PC party chuan candidate atan Pu K. Zahmingthanga an ruat thung a ni.

Dampa Bialah hian vote thlakna hmun (polling station) 1,276 a awm a, Dampa Bial chhungmi vote nei mipa 10,605 leh hmeichhia 10,185 bakah, sorkar hnathawk (service voter) mipa 111 leh hmeichhia 4 an awm a; vote nei zawng zawng hi an vaiin mi 20,905 niin, mipa 10,716 leh hmeichhia 10,189 an ni.



UNION MINISTER

Union Minister Kiren Rijiju chuan vawiin hian zan khat riakin Mizoram a rawn tlawh dawn a, Dampa bial by-election neih turah BJP Party tan hmun hrang hrangah a campaign ang.

Union Minister hian vawiin chawhnu khan Lengpui Airport lo tumin hemi hnu hian West Phaileng a pan dawn a, West Phaileng ah hian vantlang inkhawmah thusawiin bialchhunga mi hrang hrang a kawm dawn a, naktukah Reiek tlawhin hetah hian vantlang inkhawm a hmanpui dawn bakah Dampa Bial by-election atana BJP campaign hun ruat hrang hrang a hmanpui dawn a ni.



GST IN MIZORAM

Mizoram Sorkar hnuaia State Tax hotute chuan, GST kalphung thar zawm tha duhlo sumdawngte laka khauh zawka hmalak a nih theihna atan hemi bawhzui tu tur Quick Response Team an din thu an sawi.

Akashvani Aizawl zawhna chhangin, State Tax hotute chuan GST kaldan thlak a nih chungchangah, mipuite pawh an harh thar hle nia an hmuh thu sawiin, complaint pawh a luh that thu an sawi a, GST kaihhnawih bungraw hralh leh lei chungchangah dan zawm lo an awm lain, a then erawh dan zawm tha si, hriatthiam tawh loh avanga buaina nei an awm thu an sawi a, Quick Response Team lam pawhin GST kalphung thar inhrilhfiahna atan hun an hman thin thu an sawi bawh.

Deputy Commissioner of State Tax Pu Lalruatpuia sawi danin, kumin September ni 22- a GST in bung thar a kai hma a bungraw zawrh chhuah tawhte man (price) tihdanglam chu kumin December ni 31 thleng phal a nih thu leh sumdawngte’n a man hmasa thaichhe lova, a bula a man bituk thar chu an ziah mai a ngaih thu an sawi a ni.

State tax hotute chuan Mizoram chhunga sumdawngte thenkhatte chu chhiah chungchangah nasa lehzuala an than harh a pawimawh thu sawiin, GST chungchangah pawh sumdawngte aini mipui lam an harh hmasa zawk ni a an hmuh thu an sawi a, chhiah lak dan leh chhiah chawi dan kimchang taka hriat chu mi tinte mawhphurhna ni a an ngaih thu an sawi bawh.



ANIMAL RESCUE DATA

Environment Forest and Climate Change hnuaia Wildlife Divison chhinchhiah danin, kum 2020 atanga kumin 2025 thlengin, ramsa leh sava mihring awmna leh a chhehvela awm 116 zet chu hmun him zawkah dah sawn an ni.

Wildlife Division hotuten Akashvani News an hrilh danin, heng ramsa te hi a tlangpuiin mihring chenna bula hmuh an ni hlawm a, an tan a him loh avangin uluk taka an chungchang ngaihtuah a nih hnua, Aizawl sahan a enkawl an nih bakah a then chu ramhnua a chhuah leh thin an ni. Wildlife division hotute sawi danin, heng ramsa thenkhatte hi hliam na tak tuar a chhar te an awm a, ramsa hliam tuarte hi Aizawl sahan bakah Wildlife office ah te thawktuten a enkawl zui hna an thawk thin a ni.

Voicecast

Wildlife Division-in ramsa hmun him zawk a an dah zingah hian hriat theih chinah sava chi hrang hrang chi 20 an awm a, hei bakah hian rul leh saphai hi a zavai a belhkhawmin 13 a ni a, ramsa, hmun him zawk a dah zingah hian sanghar bakah kei ral leh kei te, an vai a belhkhawmin 27 an awm bawh.



NATIONAL HIGHWAY

Kolasib Addl DC Pi B. Malsawmtluangi kaihhuia vawiina sawrkar hotute leh kawngsiamtu contractor thukhawm chuan Mizoram Tripper Association leh Kolasib Joint Action Committee ten naktuk zing dar 7 atanga Pathianni tlai dar 4

thleng kawng dan an tum chu sut turin an ngen a, thla khat chhung tal contractor hnathawh ngaichang tura ngenin kawng dan luih anih chuan sawrkar chu a tul anga an chet ve a tul tur thu an sawi.

Vawiina thutkhawmah hian Kolasib Addl DC bakah Kolasib SP Pu David H. Lalthangliana te chuan naktuka kawng dan tur chu mipui nghawng thei anih avangin thulh leh hram ni se an ti a, National Highway kawng enkawltu NHIDCL leh Mizoram sorkar chu hnathawh theih hun chhung thla khat tal ngaichang tura ngenin an ngenna in awmzia a neihloha kawng an dang lui anih erawh chuan dan leh thupek kengkawhtu annih angin a tul anga hma an lak zui tur thu an sawi a ni.

Kolasib District thuneitute hian lirthei neitute thuchhuak chu an ngaichang dawn tih sawiin vawiin tlai dar 4 thleng hun an pek thu an sawi a, Mizoram chak lakna kawng anih avangin kawng dan an tum chu thilh leh turin an ngen tih an sawi bawk.

Hetih lai hian Pawl pahnihte hian Mizoram châk lakna kawngpui Vairengte - Sairang leh Bairabi - Kolasib inkar kawng khuar laite hnawh hna leh thawmthat hna thawh mek ni mah se, an hnathawh a chak tawh lo hle an ti a, tun anga an thawh reng chuan Mizoram kawngpui pawimawh hi kumin mai pawh ni lo, nakum fur hma pawhin an siam zawh a rinawm loh thu leh nakkumah phei chuan tun aia a chhiat nasat zawk an rin thu an tarlang a, sawrkar thuchhuak chu pawl anga an ngaihtuah phawt a ngaih thu an sawi a ni.



GST REFORMS

Prime Minister Narendra Modi a’n thla hmasa ni 22 a GST rate thar a puan chuan mipui te ah hlawkna a thlen mek zel a vawiinah chuan thawmhnaw leh pheikhawh a GST rate thar in nghawng a neih dan kan tarlang dawn a ni.

GST rate thar chu thawnhnaw lam siam chhuak tute pawh in hlawkpui hle in, ahma aia chhiah lak tih tlem ani chuan lei tute pawh tih zangkhai phah in, mipui ten an chhawr tangkai hle a, he dan thar hian India ram economy dinhmun nasa tak a ti thangin mi zawng zawng ban phak a thil lei leh hralh anih theih nan kawng a hawng mek a ni.

